

四庫全書

史部

欽定四庫全書

史部

欽定八旗通志卷

三十一至
三十二

欽定四庫全書

欽定八旗通志卷三十一

旗分志三十一

八旗戶籍

編審丁冊
按先人戶

另檔人戶
漢軍出旗

買賣奴婢

編審丁冊

國初定制編審各旗壯丁時令各該佐領稽察已成
丁者增入丁冊其老弱幼丁不應入冊係瀋陽者
赴瀋陽勘驗係東京者赴鞍山勘驗有隱匿者壯

丁入官伊主及該佐領領催各罰責有差

又定置買人丁及新成幼丁許令編入本佐領誤
編入別佐領下者退回

又定八旗新添壯丁每旗編佐領三十有逃亡缺
少者於諸王貝勒貝子等府壯丁內撥補足額仍
將該佐領治罪嗣後每三年編審一次

又定每佐領編壯丁二百名

又定旗員子姪俟十八歲登記部檔後方許分居

如未及歲數擅分居者議罰

又定新滿洲壯丁令酌撥舊丁內編成佐領

天聰四年十月

上諭曰令時值編審壯丁凡總兵副將叅將遊擊備禦等官俱宜自誓牛录額真各察其牛录壯丁其已成丁者即於各屯完結凡當沙汰老弱及新編幼丁係瀋陽者赴瀋陽勘驗係東京者赴鞍山勘驗此次編審時或有隱匿壯丁者將壯丁入官本主及牛录額真撥什庫等

俱坐以應得之罪若牛录額真撥什庫知情隱匿者每
丁罰銀五兩仍坐以應得之罪其牛录額真之革職與
否應俟另議凡諸貝勒包衣牛录或係置買人口及新
成丁者准與增入毋得以在外牛录下人入之如丙寅
年九月初一日以後有將在外牛录下人編入者退還
原牛录又固山額真牛录額真俱先令盟誓凡貝勒家
每牛录止許四人供役有溢額者察出啟知貝勒退還
如貝勒不從即赴告法司若不行赴告或本人告發或

旁人舉首將所隱壯丁入官若固山諸貝勒俱屬知情
即撥與別固山如諸貝勒中有不知情者即撥與不知
情之貝勒

九年七月分別管理漢人官員以各堡生聚多寡
黜陟之一等甲喇章京李思忠原管壯丁六百一
十五名凡七年增丁一百一十三名陞為三等梅
勒章京牛永章京楊於渭原管壯丁九百八十六
名凡七年增丁一百六十一名陞為三等甲喇章

京廢官佟三原管壯丁九百二十三名凡五年增
丁七十八名生聚雖少以其革職後能實心任事
優陞為三等甲喇章京牛秉章京吳裕原管壯丁
二百二十名凡三年增丁一百六十名生聚甚多
陞為三等甲喇章京三等梅勒章京李國翰原管
壯丁三百六十名凡四年增丁二百四十三名又
曾輸捐已糧米五十五石以食貧民雖值歉歲仍
生聚繁衍陞為二等梅勒章京高鴻中原管壯丁

六百七名令減一百四十一名張士彥原管壯丁
四百五十名令減一百二十八名金玉和原管壯
丁八百四十四名凡八年減一百六十九名李時
馨原管壯丁七百七十六名令減一百三名張大
猷原管壯丁六百名令減一百八十一名祝世廕
原管壯丁八百名令減二百六十名吳守進原管
壯丁七百八十一名令減三百六十六名各罰銀
百兩高拱極原管壯丁二百六十八名令減一百

五十一名蒲時雍原管壯丁一百九十九名令減
一百一十二名俱革職為民楊興國原管壯丁八
百名令減三百七十二名革職為民仍罰銀百兩
馬如龍故金海塞接管壯丁減二百八十七名罰
銀百兩革去旗鼓永與本貝勒為奴

順治八年定原在

盛京編審另分戶人有告稱係伊奴僕者不准歸併
係戶籍內人有告稱非係伊家奴僕者亦不准

九年議准內府及諸王府官員有勞績素著者特
選數員令其開出府佐領各歸所屬佐領其父子
兄弟閒散者准其帶出現有職任者不准帶出其
撥出官員不必頂替

十七年題准凡官員子弟有職任者不拘定限歲
數准其分戶

康熙四年題准滿洲蒙古有一佐領餘丁多至百
名以上願分作兩佐領者聽

八年題准凡調補管別佐領者止准帶本家壯丁
若將伊兄弟族中壯丁帶往者俱令償還

十三年覆准八旗每佐領編壯丁一百三四十名
餘丁彙集另編佐領或所餘丁僅百名以上不足
定額者該旗王貝勒貝子公等併都統副都統佐
領酌驗無誤披甲當差出結移送部亦准編作
佐領

雍正五年二月八旗都統等議覆據副都統祖秉

衡奏稱伏查定例八旗閑散人丁三年編審一次
凡身材至五尺者添註冊內已故者分析裁汰但
歷年久遠佐領等官均視為泛常隨意去留不無
遺漏錯誤之處仰請嗣後遇編審人丁年分各佐
領造具戶口冊籍務令開寫明白具外官家屬亦
不許任意隱瞞交與該都統詳查造具清冊二本
一本送部一本收貯該旗以備查閱今年即係編
審年分相應展限半年交與該旗各佐領逐一詳

查造具清冊保送戶部則既可以稽察閑散人丁
實數而屢年遺悞情弊亦可剔除等語應如所請
嗣後造審丁戶口冊俱令開寫一戶另戶某人某
人有官職者開明官銜無官職者開寫閑散人將
伊父兄職名添註本人名下將伊子弟造入戶口
下俱作另戶分造滿洲蒙古旗下家奴及滿洲蒙
古並漢軍家下壯丁等俱開列花名核明送部具
各省駐防官兵以及地方文武各官子弟家屬俱

令戶部行文各該將軍督撫查明照此造具清冊
咨送俟各處檔冊到齊之日各該旗附入佐領冊
內鈐印報部存案以後三年編審一次俱令照此
造冊俟

命下之日通行八旗併包衣佐領琿托和一體遵行奏入
奉

旨依議

七年九月戶部兵部議覆據副都統高應翺奏稱

定例八旗壯丁三年一次編審請嗣後凡世管佐領公中佐領下之另戶壯丁無論在京在屯自十五歲以上令該管官將花名與本人查對明白註冊其應裁者并聲明緣由送部稽查再原管佐領下家役甚多亦應與另戶一體編審數增者應給紀錄數減者照例治罪如有舛錯遺漏者將該管大臣官員等一併從重治罪等語查雍正四年十二月內正白旗漢軍副都統祖秉衡條奏各佐領

下造送戶口檔冊時將一戶某人名下有官無官之處開明並將伊父兄職名填註其子弟俱令分為另戶一事經八旗大臣等議覆准行在案今應如副都統高應勣所請嗣後凡世管佐領公中佐領下之家丁仍照例不議增減外其另戶壯丁遇編審察考時無論在京在屯年至十五者令該管官詳查務將花名與本丁對看方行註冊其應裁者亦必確查聲明緣由註冊送部以憑稽查再八

旗漢軍原管佐領下挑選食糧人內家僕甚多此等雖非另戶但挑選食糧時如無另戶即由家役內挑補嗣後亦應年至十五令該管官逐名編審註冊以備挑補又奏稱數增之佐領酌給紀錄數減之佐領照例治罪如有舛錯遺漏不實情弊將該管大臣官員一併從重治罪等語查壯丁三年一次編審應屬可行如果逐人查明新增之數加多亦係職分中易為之事酌給紀錄不可致其妄

布

恩賞若仍照前草率辦理將頂名者任意妄報填寫以及遺漏數減將該佐領併該管各官酌量事故重輕分別議處俟

命下之日行文八旗以及包衣佐領一體遵行奏入奉旨依議

又是年十一月八旗大臣等議覆據副都統圖克善奏稱請嗣後八旗滿洲人等產生男女俱令於

滿月之後即呈報佐領註冊至十歲時由佐領叅
領呈報都統如有隱匿者從重治罪併請傳知蒙
古漢軍以及各省駐防處一體遵行等語應如圖
克善所請嗣後自大臣官員以下至閑散人等凡
屬正身另戶生有子女俱令於滿月時即告知族
長呈報佐領註冊每年一次令各佐領查明已故
之數銷案至十歲時具結呈報叅領鈐蓋關防保
送至都統處註冊已故者查明銷案如有隱匿不

報者查出將隱匿之人交部嚴加治罪外其失察之佐領以下及族長等俱交部察議再抱養之子女亦令照此呈報註冊如非本身所生之子女妄行捏報註冊將佐領以下及捏報人一併治罪其原出結註冊之叅領等亦交部察議如此凡開檔養子緣由既明而彼此首告之弊可除矣俟

命下之日將歲數已及記檔之男女俱行查明著都統衙門註冊奏入奉



旨依議

八年正月奉

上諭京城佐領越旗移置者甚多因命大臣等均勻派定外省駐防八旗滿洲蒙古漢軍亦有隨京城佐領越旗移置者其移置之旗人丁既多則移出之旗人丁必少是以人丁數目不均如何令其不致移動之處著八旗大臣等會議具奏特諭八旗大臣等議覆從前因在京八旗漢軍佐領多寡不同

特降諭旨酌量移置俾得均勻惟各省駐防兵丁已經八十餘年其間滋息不同又有隨京城佐領移置者是以人丁數目多寡不均應令各省將軍副都統等將各該處官弁人丁數目查明不論在京之本佐領惟視彼處之丁數均勻分派若四旗駐防之處即在四旗之內均派八旗駐防之處即在八旗之內均派將均定之戶口另造清冊以備查核補授官員挑取兵丁即在所均置之旗揀選再將京

城之本旗本佐領仍記檔案每於編丁之年令其照常咨送各該旗報部至五年十年之後或有生齒多寡不同之處令各該將軍副都統等奏

聞再行均置如此則人丁數目俱得均勻而陞轉差役亦不致於壅滯矣奏入奉

旨依議

乾隆三年七月正黃旗漢軍都統奏臣旗耿姓公中三佐領奉

旨改為世管佐領其佐領下人等應作為屬下或作為
另戶恭請

欽定奉

諭旨此佐領下人等俱實係另戶着曉諭伊等知之

四年二月戶部議覆鑲黃旗漢軍副都統王進泰
條奏查三年一次編審八旗人丁關係清理戶口

整頓名分在部在旗均有稽查之責遇比丁之年
將十八歲以上者查明造入壯丁冊內分註另戶

開戶戶下填寫三代履歷鈐印咨部仍存旗一分
以備考其各省駐防并外任官員戶口由各該
將軍督撫造報自應畫一嗣後各省駐防將軍都
統以及各該督撫凡遇比丁之年將駐防人員以
及外任旗員戶口俱照石衛等省駐防處造報丁
冊之例每旗各造丁冊二分鈐印送部一分臣部
存案一分咨旗辦理庶內外事歸畫一而冊檔亦
便於稽查

六年十月戶部奏

盛京內務府未入旗檔人丁約有六七千人毫無管束請飭三旗佐領清查入冊歸於現在納差人數內將納差數目均分交納嗣後比丁之年所入人丁亦即照分納數目添差則差輕易納自無隱漏之弊奉

諭旨著照所請行

八年十一月大學士伯鄂爾泰等議覆總理

三陵事務公祿慶條奏在京八旗并外省駐防各處向例俱三年一次比丁令

陵寢所有內務府總管及總管禮部等處所屬旗人俱係在京各旗佐領下人理應一例比丁相應交與總理

陵寢事務大臣等俟比丁之年該處一應所屬旗人逐一查明悉造入比丁冊內移咨戶部各旗詳查

二十七年副都統富德條奏本旗大小官員兵丁

戶口不拘年歲每年二月內造報都察院一次

以上編審丁冊

另檔人戶

雍正七年六月鑲藍旗滿洲都統綽奇等將伊該旗佐領富泰徇隱開檔之人及養子等令當護軍之處叅奏奉

上諭佐領下滿洲少者恐廢佐領將戶下滿洲及家生子開檔人載入另戶滿洲冊內令當前鋒護軍者其情尚

可原宥倘佐領下滿洲本多而佐領知而作弊或將養
為子嗣之漢人載入滿洲冊內令當前鋒護軍則理宜
治罪爾等將富泰佐領下滿洲之數詳查具奏再八旗
現今開檔人及養子當前鋒護軍者甚多輩即與滿洲
等矣其中亦有人去得漢仗好効力行間得厯官階者
或佐領等懼罪不報而伊等又恐黜退隱忍不首必且
令刁惡之人致生訛詐控告等事著交八旗大臣等將
朕此旨曉諭各旗佐領有將開檔及養子挑為前鋒護

軍者各將緣由報明其開檔及養子亦令從實自首並不革退伊等之前鋒護軍如有人去得行走好者亦於應陞之缺列名既經開檔即係另戶惟另記檔案俾得明晰則可免後日控告之端矣倘於此時隱忍不吐實情日後查出或被旁人首告將伊等從重治罪特諭

雍正十二年七月八旗都統等議覆據署副都統事護軍叅領額爾圖奏稱除八旗所有開戶過繼養子人等內有已至前鋒護軍領催者俱各另行

記檔外伊等子弟及本身原係開戶養子已入另戶檔內之人遵

旨自行出首彼時因未至前鋒護軍領催不准另記檔案此等之人既經一例行查亦因准將伊等註入另記檔內仍分晰族支條何人之子孫編入支派照戶口造檔鈐用印信收貯存記等語查開戶養子人等內有已至前鋒護軍領催後遵

旨將本身實情首出另行記檔人等之子弟以至從前詳

查之時未至前鋒護軍領催已入另戶檔內之開戶養子均屬一體若不另行記檔恐有不肖之徒將來不無混行訛詐等弊應照額爾圖所奏遵

旨自行首出實情另行記檔人等之子弟以及曾經詳查之時未至前鋒護軍領催已入另戶檔內之開戶養子俱令各該旗復行確查分晰族支編次支派按其輩數註明何人之子何人之孫每佐領下造具清冊二本鈐用印信一本存貯該旗一本咨送

戶部永遠備查將總數交當月旗彙齊奏

聞此次行查若不將實情首出有敢隱匿者或被查出或被旁人首告從重治罪如奉

旨查明後又復黃緣串通冒入滿洲檔內者除治罪外仍記入開戶養子檔內再伊等挑選前鋒護軍併得恩賞銀兩等處俱照原奏定議給與另行記檔之人如伊等內有軍前行走衆著有勞績或漢仗好人去得辦事好有品行之人著該旗大臣預將緣由聲

明奏

聞帶領引

見補授官職如遇比丁之年伊等有添裁之處亦於丁冊

一體造寫奏入奉

旨依議

乾隆二年七月兵部查奏出征開檔兵丁准作另
戶內有家下披甲等兵不應作為另戶北路大將
軍等一併造送實屬朦混應將該處造送官員交

部察議一摺奉

諭旨此等家下披甲等兵既在軍營効力多年且該將軍等保送在一等二等之內俱着加恩照開檔兵丁例准作另戶其造冊朦混辦理疎忽之大臣官員等俱從寬免其交部

十五年正月奉

諭旨八旗另記檔案人等經朕屢次交查俱加恩仍留本任定以停其陞轉之例乃辨名定分以杜不肖上

司之索詐併伊等希圖僥倖妄行鑽營之弊也近據
鑲黃旗蒙古都統查出另記檔案之主事巴達克圖
等經該部察議具奏革職但念八旗此等人員自行
首報後陞任補用者自屬不少如不徹底清查現在
查出之人既經治罪而未經查出之人竟爾僥倖於
理未合若各旗將此等人員俱行查叅革退朕心甚
為不忍惟恐伊等失業深用惻然著傳諭八旗滿洲
蒙古漢軍都統等將所管旗分另記檔案人員徹底

查明具奏造冊送吏戶兵三部以備查對此內現任文武官員俱加恩免其革職各留本任至停其陞轉并伊等子孫不准考試居官仍准挑補前鋒護軍馬甲之處俱照從前定例遵行所有另記檔案之現任文武官員朕既加恩免其革職其叅革之鑲黃旗主事巴達克圖亦照此辦理嗣後如遇伊等陞缺該部按冊查明停其陞轉至此等人員內果有曾經効力人去得者各該處將伊等另記檔案之處聲明請旨

此朕格外特恩倘仍有隱匿不實妄圖僥倖併將另
記檔案之處不行奏明含糊保題陞轉者或經查出
或被旁人告發定將保題之該管大臣等一併從重
治罪斷不寬貸

二十一年二月

上諭八旗另記檔案之人原係開戶家奴冒入另戶後
經自行首明及旗人抱養民人為子者至開戶家奴
則均係旗下世僕因効力年久伊主情願令其出戶

現在各旗及外省駐防內似此者頗多凡遇一切差使必先儘另戶正身挑選之後方准將伊等挑補而伊等欲自行謀生則又以身隸旗籍不能自由現今八旗戶口日繁與其拘於成例致生計日益艱窘不若聽從其便俾得各自為謀著加恩將現今在京八旗在外駐防內另記檔案及養子開戶人等俱准其出旗為民其情願入籍何處各聽其便所有本身田產並許其帶往此番辦理之後隔數年似此查辦一

次之處候朕酌量降旨此內不食錢糧者即令出旗
外其食錢糧之人若一時遽行出旗於伊等生計不
無拮据其如何定以年限裁汰出旗之處交與該部
會同八旗都統等詳悉定議具奏

二十六年十一月兵部議寧夏將軍達色奏披甲
二達色打仗身亡與前鋒七爾圖吉勒通阿巴揚
阿實係平定準噶爾打仗陣亡得功牌之人應准
其作為另戶一疏奉

諭旨二達色等准其作為另戶

以上另檔人戶

買賣人口 附贖身開戶

國初定旗下買賣人口赴各該旗市交易若越至他旗市被執者身價二分入官一分給拏獲之人

又定滿洲壯丁越旗賣出被首者身價二分入官一分給首告之人買主無罪該管佐領知情者治罪壯丁撤回撥給本旗不知情者壯丁撤回撥給

本佐領下貧人

又定有將人父子兄弟夫婦分賣者所賣之族俱入官

又題准陣獲人口有將夫婦分賣者仍令給還完聚賣主鞭責

順治五年覆准投充人即係奴僕本主願賣者聽六年題准漢人不許帶出口外如口外人有來

盛京購買馬匹乘機買人口者不准放出

十年題准八旗買賣人口俱令該領催記冊備查
其民人令親隣中証立契赴本管衙門掛號鈐印
俱不必輸稅如不記冊無印契者即治以私買私
賣之罪

十八年覆准旗下赴市買人記冊時該翼查明給
以印照

康熙二年題准八旗買賣人口兩家赴市納稅記
冊令領催保結列名若係漢人令五城司坊官查

有該管官印票准買永著為例

八年題准旗下買民令本管官用印若隔屬官用
印照納解良民例議處所買之人釋放為民兩主
各鞭責有差

又議准有將定例後所買之人捏作定例前年月
用印者事發用印官及買者賣者俱加等治罪

又

詔差遣官員並督撫提鎮大小各官不許買良民為奴及

轉相餽送永行禁飭違者照略買良民例治罪

十一年議准凡在順治十年以前買人未用印信
審時中証明白者斷與原主或無中証文契本人
自稱賣身是實者亦斷與原主自順治十一年以
後買人雖有中保未曾用印者斷出為民

十二年題准旗下買民查條白契斷出為民者即
遞解原籍令地方官具文報部并咨照該督撫
十五年題准旗下買民令正印官用印准買若在

地方犯罪逃出賣身者保人係民枷號三個月責
四十板係旗人枷號三個月鞭一百原價追還給
主賣身人遞解本地方官枷號三個月責四十板
仍照所犯罪依律究治其旗人詭稱民人賣身者
枷號三個月鞭一百保人係旗人枷號三個月鞭
一百係民責四十板流徙尚陽堡若係逃人照常
鞭刺又賣身人謊寫他人姓名者照光棍為首例
保人照光棍為從例治罪又賣身人假捏籍貫名

姓不從實開寫者枷號兩個月鞭一百仍斷與買主保人係民枷號一個月責四十板係旗人枷號一個月鞭一百

十七年覆准滿洲蒙古人口不許賣與漢軍民人亦不許私贈違者將所賣人併價入官買主賣主係官革職係護軍領催披甲當差閑散旗人枷號兩個月鞭一百係民枷號兩個月責四十板該管佐領驍騎校知情者革職領催鞭一百收稅官亦

革職其喀爾喀厄魯特人亦不許賣與漢軍民人
違者亦照此例治罪

十八年題准凡旗人買民用印衙門呈送戶部轉
行該撫令地方官曉諭里甲如用印官十日內不
將買人緣由報部者罰俸一年竟不報者降一級
二十一年題准直省駐防各官及提鎮以下等官
槩不許買本省之民違者降二級調用若縱令家
人買者照本官買人例議處該管官失察降一級

留任其駐防甲兵量許買人令賣身人親至地方
官處取據口供存案立契寫情願字樣用印若未
經取供文契雖有情願字樣實係勒買者買主枷
號一個月鞭一百若本官囑託兵丁買者照本官
買人例議處如本主在京家人披甲在外駐防者
准買其在外駐防官之家人披甲者不准買

又題准地方各官不遵定例妄用印信及非正印
官擅用印信者降一級調用

二十二年議准滿洲蒙古家人違禁賣與漢軍民人者買賣之人係官罰俸一年係旗下人鞭一百條民責四十板如佐領驍騎校內管領及收稅官知情者罰俸九個月領催鞭八十所買之人併價俱入官其喀爾喀厄魯特人不許漢軍民人買用違者係官降一級調用旗人鞭一百條民責四十板所買之人入官

又題准本年十月以前有白契賣身之人審係情

願中証明白者仍斷與買主

以上買賣人口

凡贖取人口順治九年題准陣獲人口准令贖回
凡有贖人者令嫡親家屬領歸其身價兩家各取
其半

康熙三年題准已撥給山海關外叛逆人犯妻子
家僕有私行偷賣贖去者賣主係官革職係民杖
一百流三千里係旗人枷號兩個月鞭一百專管
各官俱降二級調用如偷賣贖軍流等犯妻子家

僕者亦照此例議處

七年覆准私贖叛逆家屬照例治罪人口身價俱

入官

十七年議准滿洲蒙古家人其主願令贖身在本
佐領及本旗下者聽若違禁放出為漢軍民人者
照買賣例治罪

二十一年覆准旗下用印所買之人及舊奴僕內
有年老疾病各主情願准贖者呈明都統移送戶

部令其贖出為民若將年壯舊人借稱贖出者照
買賣例治罪

乾隆二年三月戶部奏准嗣後旗下家奴果係伊
主念其數輩出力勤勞年久情願准其贖身放出
為民務照定例呈明本旗報明戶部轉行地方官
收入民籍如有私自放出並不呈旗咨部行知該
地方官入籍為民者地方官即查明呈報將本主
照例治罪

三年直隸總督以私自放出之戶從前雖未呈報
旗部但入籍年久若令歸旗究屬屈抑咨請為民
經戶部酌議具奏內開乾隆元年以前放出為民
之戶其有未經呈報旗部者該旗查明果係數輩
出力伊主念其勤勞情願放出編入民籍年久地
方官有冊可據者准其為民如係借民設法贖身
私入民籍伊主既經得過身價銀兩應令歸旗作
為開戶壯丁

四年十月議政王大臣八旗大臣會同戶部議奏
內稱各旗

盛京帶來并帶地投充之奴僕以及乾隆元年以前
白契作為印契家人之祖父籍貫飭令叅佐領等
自奉

旨之日於一年限內令各本主據實開報該都統核明
送部遇有開戶為民之案以便查考其有遠年俘
獲并印契置買家人伊等祖父姓名籍貫一體造

冊咨送戶部查核至各省旗人自文到之日為始
於一年限內造冊送旗查明送部查核嗣後凡遇
比丁之年即照此次造報之例於編審冊內註明
以便查考

又是月議政大臣八旗大臣會議覆戶部摺奏內
開查旗下奴僕家主情愿放出乾隆元年以前已
入民籍及借名設法贖身鑽營勢力欺壓贖身等
款節經怡賢親王暨戶部先後奏准定有成例應

仍照舊例遵行外至乾隆元年以前未經入於民籍以及乾隆元年以後始入民籍者既係伊主念其勤勞情願放出之人與借名贖身并欺壓本主者原屬不同今借名贖身者尚准作為開戶壯丁而此等放出之人遽令歸還原主作為家奴似未平允臣等酌議此等放出為民未經入籍及入籍在元年以後之戶應令歸旗作為原主名下開戶壯丁至于設法贖身之戶例應作為開戶壯丁者

其已經議結之案毋庸置議外其未結之案或係
自備身價贖身或親戚代為贖身者均應歸原主
佐領下作為開戶若有實在用價契買隨又交價
贖出者均應在買主佐領下作為開戶如經開戶
壯丁給價買出者伊等原非另戶正身其名下不
便復有開戶之人仍應歸原主佐領下作為開戶
十二年七月戶部奏准查八旗戶下家奴有借名
設法贖身私入民籍以及旗民兩間者例應歸旗

入於原主佐領下作為開戶此等戶口雖歸於原主佐領之下但係佐領下之開戶而非原主名下之開戶既無本主拘管而披甲當差等事又有各佐領下另戶伊等不能挑補差使閑散無事必致漸成游惰伏查先經議政王大臣等會同八旗大臣所定條款內有乾隆元年以前放出為民之戶果係伊主情願放出入籍年久者准其為民如乾隆元年以後始入民籍伊主念其勤勞情願放出

者應令歸旗作為原主名下開戶等語是勤勞願
放之僕例應歸旗者尚入於原主戶下令借名設
法為民之戶查出反歸入於佐領下作為開戶而
不歸原主似屬輕重不均臣等酌議此項借名設
法為民之僕除從前已經議結之案毋庸置議外
嗣後凡此等案件或被首告或經察出查明曾報
部旗伊主得過身價者應令歸旗入於原主名下
作為開戶不准歸本佐領下如未經報明部旗無

論伊主曾否得過身價俱令歸旗仍作為原主戶
下家奴不准歸入佐領作為開戶

四十八年三月奉

上諭向來滿漢官員人等家奴在本主家服役三代實
在出力者原有准其放出之例此項人等既經伊主
放出作為正身亦未便絕其上進之階但須明立章
程於錄用之中仍令有所限制嗣後此等旗民合例
後該家主放出者滿洲則令該家主於本旗報明咨

部存案漢人則令該家主於本籍地方官報明咨部
存案經部覆准後方准其與平民一例應考出任但
京官不得至京堂外官不得至三品以示限制著為
令

以上贖
身開戶

以上買賣人口併贖身開戶

投充人戶

順治元年定凡投充人口有父母兄弟妻子情願
入旗同居者地方官給文赴部入冊不許帶田地

投獻

二年題准近京地方管莊人等強壓愚民及工匠勒令投充者在內許赴戶部五城御史順天府任外赴道府州縣告理審實釋放

又題准有假借投充冒名奴僕混托廝養或悍奴欺壓故主部民凌厲本官及慢侮縉紳傾陷富室占騙人口財物者事發治以重罪

三年題准自次年為始漢人投充旗下永行禁止

七年題准投充人置買民間房地者房地並價銀
入官買賣兩造從重治罪

八年題准旗下探親回籍之投充漢人該佐領報
部給票前往如無部票即係私逃許地方官執解
又

諭投充人生事害民本主該佐領知情者連坐前此有司
責治旗人問罪以致投充人益加肆橫今後地方官遇
投充人犯罪與屬民一體究治戶部刊示曉諭

十七年題准投充人誣稱不係投充者審出鞭一百如果不係投充欺騙良民者亦鞭一百

又題准有將另戶人告稱係伊奴僕者鞭八十其投充人先未在地地方納糧後將房地納糧輒稱不係投充者審出枷號一個月鞭一百地方官混報者以抗違論經承責三十板其民人住種滿洲房地年久告稱係自己房地者責三十板

又覆准各莊俱設屯領催責成清察如有指稱投

充欺詐百姓者如實解部究審如係假冒地方官
依律究擬

康熙二年覆准凡投充人父兄伯叔住種滿洲房
地子弟姪看守故土墳塋或子弟姪住種滿洲房
地父兄伯叔看守故土墳塋者行地方官查其輸
糧在先紅冊載名者即斷為民如投充後輸糧者
仍斷與滿洲

八年

詔投充人生事害民者本主及該管佐領連坐本犯正法
妻孥家產入官罪不致死者本犯及妻孥入官嗣後地
方有司遇投充人犯罪與屬民一體責治

九年題准凡官員將投充人稱為納糧之民並改
糧冊年月移送者革職轉申上司降一級調用巡
撫罰俸一年如先稱不係投充後報投充者地方
官降一級調用該管上司罰俸一年巡撫罰俸六
個月

十五年題准嗣後有以投充滿洲之人稱為納糧
之民者地方官降一級調用轉申上司罰俸一年
巡撫罰俸六個月先稱不許投充後報投充者地
方官罰俸一年該管上司罰俸六個月巡撫罰俸
三個月

以上投充人戶

漢軍出旗

乾隆七年四月奉

上諭八旗漢軍自從龍定鼎以來國家休養生息戶口日繁其出仕當差原有俸祿錢糧足資養贍第閑散人多生計未免窘迫又因限於成例外任人員既不能置產另居而閑散之人外省既有親友可依及手藝工作可以別出營生者皆為定例所拘不得前往以致袖手坐食困守一隅深堪軫念朕思漢軍其初本係漢人有從龍入關者有定鼎後投誠入旗者亦有緣罪入旗與夫三藩戶下歸入者內務府王公包

衣撥出者以及召募之炮手過繼之異姓并隨母因親等類先後歸旗情節不一其中惟從龍人員子孫皆係舊有功勲歷世既久自毋庸另議更張其餘各項人等或有廬墓產業在本籍者或有族黨姻屬在他省者朕意欲稍為變通以廣其謀生之路如有欲改為原籍者准其與該處民人一例編入保甲有不願改入原籍者而外省可以居住者不拘道里遠近准其前往入籍居住此內如有世職仍許其帶往一

體承襲其有原籍並無倚賴外省亦難寄居不願出旗仍舊當差者聽之所有願改歸民籍與願移居外省者毋論京外官兵閑散俱限一年內具呈本管官查奏如此屏當原為漢軍人等生齒日多壽久遠安全計出自特恩後不為例此朕格外施恩原情體恤之意並非逐伊等使之出旗為民亦係為國家糧餉有所不給可令八旗漢軍都統等詳悉曉諭仍詢問伊等有無情願之處具摺奏聞

八年四月奉

旨朕因八旗漢軍戶口日繁生計未免窘迫又限于成
例不能外出營生特降諭旨除從龍人員子孫毋庸
更張外其餘各項入旗人等有願改歸民籍與願移
居外省者准其具呈本管官查奏原指未經出仕及
微末之員而言至服官既久世受國恩之人在伊等
本身及伊等子弟自不應呈請改籍而朕亦不忍令
其出旗此奏內文職自同知等官以上武職自守備

等官以上俱不必改歸民籍

二十七年六月軍機大臣會同八旗大臣議覆順天府府尹錢汝誠等條奏出旗為民人等有情願入順天府屬州縣民籍者由該旗咨部外即行造冊派員帶領為民人等家口一併交送順天府令該府尹查收隨派人轉送至伊等情願所入州縣查收編入村莊查管收訖之日咨覆該旗備查

十月又奉

上諭叅革海州知州鄔承顯之子鄔圖麟等久未歸旗
一案經該旗叅奏降旨令陳宏謀明白回奏令據覆
奏鄔承顯任內有應追贓項未完着落伊子等繳還
是以未即回旗再鄔德麟已入含山縣籍家口仍留
福建舊任鄔圖麟並請改入河南孟縣民籍等語似
此逗遛規避實乃漢軍敝習不可不亟為整頓伊等
既任外官罷職如有未完之項自應勒限速完實係
無力追繳即當歸旗按律治罪何得任其遷延在外

藉設措告貸之名任意游蕩抽豐馴致滋生事端何
所不有況該旗已經咨催飾詞延玩此在民人猶不
可為訓何況身為旗人者乎即以情願改歸民籍而
言現在著有定例並未稍為禁阻第伊等或呈請於
並無追項之前或聲明於完欠回旗之後皆屬可行
若借此巧為趨避懸帑項而廢官方此風斷不可長
嗣後外省叅革漢軍人員有應完款項着於定限內
催追為數過多酌量展限完納倘逾限不完即將該

員等解旗治罪此案陳宏謀既未准其改籍並將鄔
德麟等押解回旗該旗可即遵旨辦理將來有似此
者均照此例行

二十八年二月奉

上諭開泰奏達州知州郎炳之子郎世琳請改歸民籍
一摺辦理甚為舛繆向來漢軍有願入民籍者原屬
例所准行郎世琳果於該旗未催回籍之前自行呈
請並無不可令以屢催不應轉藉此為名冀遂其自

便狡延之計開泰稍揆事理即應據寔叅奏為歸旗
逗遛者戒乃竟據以瀆請是其一意沽名豈封疆大
臣辨公之道郎世琳著交開泰等解來京交刑部治
罪倘致免脫則開泰當其罪

二十九年十月奉

諭旨鄂寧前奏所管漢軍本旗內有總兵吳應銓等俱
身在旗籍而令伊子出旗為民應將伊等治罪一摺
朕即交八旗大臣議奏原欲各旗一體畫一將有似

吳應銓等違例之人通行查出治罪也令八旗大臣
查出少卿秦烱等俱係職官曾經降旨不准出旗之
人伊等竟設法鑽營令伊伯叔子弟出旗為民則伊
等之不願在旗不問可知前次垂念伊等身為大員
承受國恩日久不便遽行出旗是以特降諭旨迨至
議覆鄂寧摺奏八旗大臣等理應議令伊等照舊在
旗請旨議罪方為允協乃將伊等一槩出旗其名似
以斥令出旗即為治罪之法其實直如伊等所願為

之准行矣朕豈肯任其嘗試朦混乎八旗大臣等倘
暗受伊等干求故意巧為辦理即屬營私舞弊朕若
由此深究恐伊等難以任受如實係不曉事理所致
則其糊塗尤為可笑且八旗大臣中或有尚可將此
自諉者至王進泰所司何事而亦可以不知自解乎
現在查出秦烱之子秦廷璽等俱著撤歸本旗充當
苦差行走秦烱等並著交部治罪其從前准令伊等
出旗之該管都統及此次議令出旗之八旗漢軍都

統一併交部嚴加議處

三十二年五月奉

旨陳時泰歸入民籍已經數年且該旗應襲佐領尚屬
有人陳時泰不必歸旗至該旗從前並未奏請辦理
殊屬不合着交部察議

四十年十月軍機大臣會同正白旗查奏朱賓等
呈請回旗一案朱賓朱寶原係正白旗閑散於乾
隆十八年入巡捕營食糧二十三年本旗將二人

出旗編入大興民籍查乾隆八年戶部議覆施純
愷出旗案內曾奏明襲職有分之人不准出旗在
案該旗並未詳查輒將伊二人俱令出旗實屬錯
悞再查延恩侯爵係雍正二年奉

世宗憲皇帝特旨加恩賞賜明代子孫朱廷檉嫡孫朱之
璉之職並非朱之璉得有功績所自立者凡朱廷
檉子孫均屬有分朱賓朱寶二人係朱廷檉嫡派
子孫自未便令其出旗請將二人仍令回旗照例

當差但伊等於初辦出旗時並不聲明呈請乃相隔十八年之久直至出有侯爵始請回旗明係覲覲承襲希圖僥倖應請將朱賓朱寶遇有應襲時其本身概不准列名揀選以示炯戒奉

旨朱賓朱寶二人准其回旗照例當差但遇應襲侯爵時伊二人本身及其子俱不准列名揀選至所襲侯爵着軍機大臣會同該旗揀選帶領引見

五十五年七月戶部議奏正紅旗漢軍都統弘晈

等叅奏原任廣東新寧縣知縣夏永淳于五十二年計典叅劾業經催令歸旗准廣東巡撫咨報該員貧病無力回京情願改歸江南丹徒民籍一案臣等查定例八旗漢軍京員主事以上旗員五品以上外官同知守備以上不准改入民籍六品以下現任職官并一應候補候選告休革退文武官員及兵丁閑散人等情願改入民籍者在京准具呈明本旗在外呈明所在省分督撫核實報部改

入民籍在外者叅革漢軍人員應完欠項逾限不完者應將該員等解旗治罪不准為民今查夏永淳先據該撫咨報無力歸旗改入民籍嗣據正紅旗都統查報夏永淳祖墳現在京無人看守祭掃不便任其為民咨部轉行催令回旗經臣部以有無未完欠項一併咨查續據該撫查覆夏永淳並無未完欠項若照例辦理應准其改歸民籍令該都統奏稱夏永淳祖父俱係職官當伊父原任知

州夏建寅病故之時伊兄弟六人原應歸旗當差而夏永譽等以身係閑散均援例改入民籍惟夏永淳係屬捐納縣丞希圖子弟可以在旗考試仍留旗籍今歷外任多年復稱情願為民籍端規避旗差奏請停止漢軍六品以下職官為民之例臣等伏思八旗漢軍人等仰蒙

國家教育深仁游歷官階受恩優渥退官解任之後理宜歸旗當差圖報乃有歷外省之員初以身歷

旗籍僥倖出身一經解任即耽安逸請改民籍似
此藉詞規避殊屬狡詐不便仍令為民以遂其設
法出旗之心應如所奏漢軍六品以下職官准其
為民之例即行停止其兵丁閑散人等仍照舊例
辦理奉

旨知道了

以上漢軍出旗

欽定八旗通志卷三十一

欽定四庫全書

欽定八旗通志卷三十二

兵制志

謹案十紀以來以兵定天下者黃帝為首故言兵制者始風后之握奇經其書真偽不可知其公孫宏等之註釋真偽亦不可知然其法律井井四奇四正變化不窮兵家終莫易其法也夏殷以前兵制不可考其可考者莫詳於周禮所謂六鄉六遂

各以卿大夫司民事經理其教養修明其政令三
時務農一時講武無事則各執其業有事則按井
出賦合而為天子之六軍故其時軍民不分吏與
將帥亦不分所謂寓兵於農其法至善秦漢以後
時易勢更鎮戍徧天下而非內重即外重迄不能
臂指相使綱目相維唐初設折衝果毅府畧得其
意而顯慶以後浸淫漸廢藩鎮遂割據而不寧核
其因革之由知古聖人慮遠而計周也我

朝

出震乘乾用

武功開國定制以人戶隸佐領以佐領隸叅領以叅領隸都統副都統皆司其版籍經其土田掌其教化平其訟獄而歸於詰其戎兵於周禮鄉遂之法如重規疊矩誠所謂先聖

後聖其揆一矣至八旗之制則實同於風后之握奇蓋天地之數皆以九為紀而九數所積則皆八周外而

一居中河圖洛書皆四奇四耦統於五十天有九
宮地有九野皆以四正四隅環乎中央即井田之
制以八家同養公田亦因天地自然之象焉風后
之陣數用八諸葛亮魚腹石陣亦用八其奇正相
錯而變化生正隅相輔而彌縫密蓋以此也

大聖人規矩在握造化生心默與天地通而闇與古之聖
賢合法立一時制垂萬禩洵酌古今之宜而得變
通之利者矣謹臚其制度具列如左至備折衝者

曰前鋒司宿衛者曰護軍職巡察者曰步軍戍重
鎮者曰駐防以及火器營之習遠攻健銳營之簡
驍果並詳其規制條教用見我

列祖

列宗所以削平僭亂蕩滌洪鑪百戰無敵於天下與我

皇上神謨密運

駿烈光昭

坐照九天之上而制勝萬里之外

武功十全為攝提合維以來所未嘗睹者有由然也

兵制志一

八旗兵制

太祖高皇帝初設四旗先是癸未年以

顯祖宣皇帝遺甲十三副起事征尼堪外蘭敗之又得兵

百人甲三十副後以次削平諸部歸附日衆初出

兵校獵不論人數多寡各隨族長屯寨行每人取

矢一每十人設一牛錄額真領之至辛丑年設黃

白紅藍四旗旗皆純色每旗三百人為一牛录以牛录額真一轄之

謹案是年為編牛录之始嗣後設固山額真梅勒章京甲喇章京等官雍正二年以八旗都統印信額真二字作主字解非臣下所得用改為固山諸班茲敬按年月於改定以後書新名改定以前仍舊稱以昭初制

甲寅年始定八旗之制以初設四旗為正黃正白正紅正藍增設鑲黃鑲白鑲紅鑲藍四旗合為八旗黃白藍均鑲以紅紅鑲以白每三百人設牛录額真一五牛

錄設甲喇額真一五甲喇設固山額真一每固山
設左右梅勒額真各一以轄滿洲蒙古漢軍之衆
時滿洲蒙古牛錄三百有八蒙古牛錄七十六漢
軍牛錄十六行軍時地廣則八旗並列分八路地
狹則八旗合一路而行

天命五年改設八旗官定總兵官為三等其副將
叅將遊擊亦如之各牛錄額真俱為備禦官每牛
錄下設千總四人

天聰八年五月

上諭凡我國官名俱當易以滿語勿仍襲漢語舊名今悉
為釐定五備禦之總兵為一等公一等總兵官為一等
諳班章京二等總兵官為二等諳班章京三等總兵官
為三等諳班章京一等副將為一等梅勒章京二等副
將為二等梅勒章京三等副將為三等梅勒章京一等
叅將為一等甲喇章京二等叅將為二等甲喇章京遊
擊為三等甲喇章京備禦為牛录章京代子為分得撥

什庫章京為小撥什庫旗長為專達屯撥什庫仍舊名
凡管理不論官職管固山者即為固山額真管梅勒者
即為梅勒章京管甲喇者即為甲喇章京管牛录者即
為牛录章京管巴雅喇纛額真即為纛章京管巴雅喇
甲喇章京額真即為巴雅喇甲喇章京嗣後皆照我國
新定者稱之又

上諭滿洲蒙古漢人兵衆前此騎步守哨等兵雖各有營
伍未分名色故止以該管將領姓名稱為某將領之兵

今宜分辨名色永為定制隨固山額真行營馬兵為阿
禮哈超哈巴雅喇營前哨兵為噶佈什賢超哈駐防盛
京兵為守兵預備兵為援兵各城寨兵為守邊兵舊蒙
古左營為左翼兵右營為右翼兵舊漢兵為烏真超哈
元帥孔有德兵為天祐兵總兵官尚可喜兵為天助兵
謹案阿禮哈超哈為驍騎營之始巴雅喇為護軍
營之始噶佈什賢超哈為前鋒營之始天祐天助
兵後俱歸漢軍蒙古
兩翼後仍分八旗

九年設蒙古八旗先是八年以所獲察哈爾戶口

分給八旗是年正月復以察哈爾來歸官兵分隸
各旗復編審蒙古及舊喀喇沁壯丁分為蒙古八
旗其旗色與滿洲同每旗設固山額真一梅勒章
京二甲喇章京二分轄所編牛录

崇德二年分漢軍為二旗設左右翼二旗旗皆皂
色每旗設固山額真一轄所編牛录

四年分漢軍為四旗旗色一以皂鑲黃一以皂鑲
白一以皂鑲紅一純皂色每旗設固山額真一梅

勒章京二甲喇章京四牛录章京十八

五年五月設索倫兵牛录先時索倫部自索海班
師後續有三百三十餘戶來降

上命理藩院叅政尼堪擇可為首領者授為牛录遂分八
牛录領之

六年四月

上名衆於篤恭殿諭曰八家所屬牛录舊取辦事人四名
銀匠五名今宜各退辦事人二名銀匠四名每牛录許

留銀匠一名鐵匠一名辦事人二名王貝勒等各令家
下漢人學習匠役待三年後再將各牛录匠役停止每
牛录原鐵匠六名王貝勒取一名退去一名止許留四
名每牛录滿洲三人中許一人披甲以六十名為常數
其中或多或少務於三人中選一人他牛录甲雖有餘
亦不許補不足者今後漢人匠役不許造弓箭貨賣違
禁造賣者治罪各牛录人有造弓者該牛录章京親驗
給角觔製造令鞍匠造鞍有弓鞍不如式及擅索弓價

推諉不造者送法司治罪有舊披甲人詐稱年老令家
奴代披及牛录章京之子徇私不令披甲者各固山額
真牛录章京稽察其有稽察不公後被牛录首首出者
罪之

七年始設漢軍八旗定旗色與滿洲八旗同每旗
設固山額真一梅勒章京二甲喇章京五

八年六月

諭戶兵二部各旗間散蒙古宜清查人丁編入佐領俱令

披甲現在滿洲旗下者察其壯丁毋許混匿其諸王貝勒貝子公等家間散蒙古編為小旗設巴雅喇轄之

順治元年

世祖章皇帝定鼎燕京分置滿洲蒙古漢軍八旗於京城
內鑲黃正黃居北方正白鑲白居東方正紅鑲紅
居西方正藍鑲藍居南方鑲黃正白鑲白正藍為
左翼正黃正紅鑲紅鑲藍為右翼左翼自北而東
而南鑲黃在地安門內正白在東直門內鑲白在

朝陽門內正藍在崇文門內右翼自北而西而南
正黃在德勝門內正紅在西直門內鑲紅在阜城
門內鑲藍在宣武門內

又定八旗都統所轄甲兵滿洲蒙古旗每佐領下
設親軍上三旗隸領侍衛府下五旗隸宗室王公
設前鋒隸前鋒統領設護軍隸護軍統領設步軍
領催及步軍隸步軍統領其本營領催驍騎及弓
匠鐵匠鞍匠等各隸本旗都統漢軍旗每佐領下

設步軍領催及步軍隸步軍統領其本營領催驍
騎各隸本旗都統

謹案

本朝兵制各旗官員兵丁戶口屬籍無不隸於都統
至於簡用充補自驍騎營而外則各該管大臣分
領馬其領侍衛府八旗前鋒營護軍營步軍營內
府三旗營營制具
列後卷分門備載

又設

盛京八旗駐防兵時以遷都燕京

命內大臣何洛會為

盛京總管設左右翼梅勒章京各一統領駐防兵

又設直省八旗駐防兵順治二年分遣八旗兵駐防直隸順德山東濟南臨清德州江南徐州山西平陽潞安蒲州八城後依各省形勝設將軍都統副都統或但設城守尉防守尉駐防

又設直省綠旗營凡直省漢兵俱以綠旗為辨總督所屬為督標巡撫所屬為撫標提督所屬為提標總兵所屬為鎮標其屬於河道總督者為河標

屬於漕運總督者為漕標

謹案綠旗營制屬督撫提鎮專轄不隸八旗都統本志不具載

又設外藩扎薩克各旗先是天聰年間科爾沁各蒙古相繼款附

定鼎之後以次編旗凡內扎薩克二十五部為五十一旗每旗扎薩克一人協理旗務者無定員以王貝勒貝子公台吉等為之設都統副都統以本旗台吉兼任叅領佐領驍騎校驍騎如內八旗之制至康

熙三十年設喀爾喀各旗三十六年設賀蘭山厄
魯特旗及哈密旗四十三年設額濟內土爾扈特
旗雍正三年設青海各旗十年設吐魯番旗乾隆
十九年設杜爾伯特各旗各隨人衆編佐領有差
設守衛

陵寢官員兵丁先是天聰八年

永陵設散秩官至是

福陵

昭陵

永陵各設雲騎尉又增設散秩官嗣後

盛京

三陵各增設總管副總管防禦驍騎校等員又於京師
東陵

西陵各設總管副總管防禦驍騎校等員

順治十七年

上諭嗣後固山額真清字仍稱固山額真漢字稱為都統

梅勒章京清字仍稱梅勒章京漢字稱為副都統甲喇
章京清字仍稱甲喇章京漢字稱叅領牛录章京清字
稱為牛录章京漢字稱為佐領諳班章京清字稱為諳
班章京漢字稱為總管烏真超哈清字稱為烏真超哈
漢字稱為漢軍

又經大臣議定噶布什賢噶喇諳班漢字稱為前
鋒統領巴雅喇蘇章京漢字稱為護軍統領噶布
什賢章京漢字稱為前鋒叅領巴雅喇章京漢字

稱為護軍叅領噶布什賢專達漢字稱為前鋒校
巴雅喇專達漢字稱為護軍校分得撥什庫漢字
稱為驍騎校

又定王公府屬武職官員兵丁分別親王郡王貝
勒貝子鎮國公輔國公等以次設長史散騎郎護
衛等職并府屬佐領下各設驍騎校驍騎有差

謹案王公府屬官兵附於
禁衛兵制之後另為一條備載於後

康熙十四年設遊牧察哈爾八旗時以遷察哈部

衆於宣化府大同府邊外編為八旗如內制三十
八年增設總管初隸蒙古八旗都統後又增設都
統駐張家口乾隆二十六年增設都統副都統以
下官職有差

康熙二十三年設三旗虎槍營以備蒐狩三十年
設火器營以習火器

雍正二年設

圓明園八旗護軍營又設

圖明園內府三旗分地駐劄以備翊衛

謹案增設三旗虎槍等營其官制兵額詳見後卷分門備考

雍正二年設漢軍藤牌兵每佐領下藤牌兵四名
乾隆元年定漢軍每旗設藤牌兵一百名六年定
藤牌兵歸併大營每旗百名於烏鎗手額內挑取
並簡選叅領一人散秩官驍騎校各二人領催五
人令其管轄

雍正六年奏定八旗方位

謹案八旗方位詳見
旗分志茲不復載

乾隆十三年設內府前鋒營即於內府三旗護軍
營內簡選充額仍屬護軍統領管轄

十四年設健銳營總統無定員以王公大臣兼任
率兩翼長八旗前鋒叅領等統轄前鋒兵演習雲
梯諸技是為雲梯兵

二十六年設西域新疆駐防兵時以平定準噶爾
回部分派滿洲兵索倫兵察哈爾兵綠旗兵視各

處地形酌量分駐卡倫兵領以侍衛屯田兵領以
督屯武職駐防馬兵隸於佐領綠旗兵隸於營員
其四兵則各城伯克經理而以駐劄之將軍大臣
總轄之各兵丁或携眷永駐或三年更代以次增
設無定額

十七年設

盛京內府三旗總管先是順治三年設

盛京內府鑲黃旗正黃旗佐領八年設正白旗佐領

至是令三旗佐領皆歸總管統轄

謹案我

朝以神武開國先立四旗以統人衆尋以歸附日廣增設八旗以旗統人即以旗統兵隸乎旗者皆可為兵非必有名募之煩而後收兵之用也

列聖相

承規模大備內而京營則有親軍前鋒驍騎護軍步軍之分或用上三旗或兼用八旗外而直隸各省駐防兵用八旗各標及營汛兵用綠旗營百數十十年增損斟酌盡善我

皇上智勇天錫親

光揚

烈

天戈所揮無思不服自西陲底定式廓版圖列戍開屯威宣化洽至于外藩諸部奔走偕來分職編旗與內八旗相等望風懷景航海檣山

武功十全超邁前古凡皆

睿算神謨先機決勝於萬里之外固不徒矜識獻之功
資熊羆之力是以開窮日月構盡乾坤洵億萬世
經武之鴻圖迄乎無外者也茲謹敘兵制以

禁衛駐防

恩卹軍令軍政教閱軍器馬政彙為八門依類備載

欽定八旗通志卷三十二